

1. **KANTONALNO TUŽILAŠTVO KANTONA SARAJEVO – ul. Radićeva br. 6, Sarajevo, kojeg zastupa Glavna Kantonalna tužiteljica Kantona Sarajevo DALIDA BURZIĆ, ID: 4200223290004, (u daljem tekstu: Naručilac/Investitor);**
2. **„NOVA GRADNJA” d.o.o. Vogošća, ul. Branilaca Vijenca b.b., 71320 Vogošća, kojeg zastupa direktor Dino Alić, ID: 4201333090007 (u daljem tekstu: Izvođač);**

zaključuje se sljedeći:

UGOVOR

O NABAVCI RADOVA - NABAVKA RADOVA NA IZGRADNJI I SANACIJI SJEVERNOG KRILA POTKROVLJA KANTONALNOG TUŽILAŠTVA KANTONA SARAJEVO

Član 1.

Predmet ovog Ugovora je nabavka radova - **Nabavka radova na izgradnji i sanaciji Sjevernog krila potkrovlja Kantonalnog tužilaštva Kantona Sarajevo**, za koju je sproveden ponovljeni pregovarački postupak bez objave obavještenja o nabavci, na osnovu prihvaćene Ponude broj: 29-09/2017.g. od 06.10.2017. godine i Odluke o izboru najpovoljnijeg ponuđača broj: A-III-46/17-VII od 09.10.2017. godine.

Tenderska dokumentacija broj: A-III-46/17 od 22.09.2017. godine i Ponuda Izvođača broj: 29-09/2017.g. od 06.10.2017. godine, sastavni su dio ovog Ugovora.

Član 2.

Pošto se prethodno upoznao sa svim uslovima, pravima i obavezama koje kao Izvođač ima u vezi izvršenja svih radova koji su predmet ovog ugovora i za koje je dao svoju ponudu, Izvođač se obavezuje da radove iz ovog Ugovora izvede prema tehničkoj dokumentaciji, stručno i kvalitetno, pridržavajući se tehničkih propisa, pravila i standarda koji važe u Bosni i Hercegovini, a posebno da:

- Kod uvida u tehničku dokumentaciju prema kojoj treba izvesti radove, obrati posebnu pažnju i na vrijeme upozori Naručioca/Investitora na nedostatke u istoj, ukoliko postoje, odnosno, ako su navedene eventualne određene suprotnosti sa propisima;
- Odgovara za urednu realizaciju Ugovora, štiti interese Naručioca, te ga obavještava o toku realizacije ugovora;
- Ugovorene radove izvrši u skladu sa tehničkom dokumentacijom, važećim tehničkim propisima, standardima i preporukama i u skladu sa instrukcijama Nadzornog organa;
- Dostavi Naručiocu/Investitoru na odobravanje Program organiziranja izvođenja radova (tehnički opis organizacije izvođenja predmetnih radova, organizacionu šemu, lokacije za građevinski materijal i opreme za izvođenje radova, te Dinamički plan izvođenja radova sa grafičkim prikazima izvođenja glavnih aktivnosti i tehnoloških faza radova u prostoru i vremenu), na dan zaključenja Ugovora;
- Sve ugovorene radove izvrši u obimu i kvalitetu prema ugovoru, pridržavajući se ugovorenih rokova za izvođenje radova;
- Da u roku od 7 (sedam) dana od datuma potpisivanja Ugovora, dostavi Naručiocu/Investitoru garanciju za dobro izvršenje ugovora na iznos 10% ugovorene cijene, odnosno na iznos od

- 25.464,06 KM, a koja će važiti cijelo vrijeme trajanja ugovora + 30 dana (90 kalendarskih dana, računajući od dana uvođenja u posao + 30 dana);
- Pismenim aktom odredi stručno lice, koje u smislu odredbi Zakona o prostornom uređenju Kantona Sarajevo (Službene novine Kantona Sarajevo broj 7/05), kao odgovorni voditelj građenja, rukovodi izvođenjem radova;
 - Prijavi gradilište, u skladu sa propisima o zaštiti na radu inspekciji rada, najkasnije 7 (sedam) dana prije početka radova;
 - Dostavi Naručiocu/Investitoru zahtjev za odobrenje zaključenja podugovora s konkretnim podugovaračem, uz detaljno navođenje koji dio ugovora namjerava podugovarati, u kojem obimu i identitet podugovarača;
 - Snosi punu odgovornost za realizaciju kompletnog ugovora, bez obzira na dio koji je podugovorom prenio na podugovarača;
 - Podugovarače angažovane za izvođenje predmetnih radova može mijenjati samo uz saglasnost Naručioca/Investitora;
 - Nabavi i ugradi materijale, opremu i uređaje koji su navedeni u Predmjeru i Ponudi br. 29-09/2017.g., a koji odgovaraju standardima, tehničkim normativima, odnosno koji moraju imati ateste o kvalitetu materijala i izdate od strane stručne organizacije registrovane za ispitivanje tog materijala;
 - Garantuje da je isporučena roba nova, nekorištena i da sadrži sve nove dijelove, te da odgovara posljednjoj fazi ostvarenog razvoja u fazi projektovanja, konstrukcija i materijala i da je u obimu, karakteristikama i garantovanim tehničkim parametrima i standardima, u svemu prema Tehničkim specifikacijama i ponuđenim karakteristikama;
 - Na zahtjev Nadzornog organa ukloni sa mjesta izvođenja radova materijale za koje se utvrdi da nisu odgovarajućeg kvaliteta;
 - Obezbjedi sigurnost objekta, lica na gradilištu, prolaznika, susjednih građevina, kao i nesmetano odvijanje saobraćaja, neposredno je odgovoran i dužan nadoknaditi sve štete koje izvođenjem ugovorenih radova pričinu trećim licima i imovini;
 - Sva lica zaposlena na mjestu izvođenja radova iz ovog Ugovora moraju biti osigurana od strane Izvođača, o njegovom trošku, za sve povrede na radu ili za slučaj nesreće na poslu, Naručilac/Investitor neće biti odgovoran za bilo koje odštete ili kompenzacije koje se trebaju isplatiti za bilo kakve povrede osiguranih lica;
 - U toku izvođenja radova, uredno vodi gradilišnu dokumentaciju (građevinski dnevnik, građevinsku knjigu i knjigu inspekcija);
 - Da po zahtjevu Nadzora nad građenjem obezbijedi radnu snagu potrebnu za obaveze snimanja i mjerenja izvedenih radova po svim tehnološkim fazama izvršenja radova, i to bez prava naplate za izvršene usluge. Izvođač je obavezan da po pozivu Nadzora nad građenjem prisustvuje njegovom radu, prilikom ispitivanja kvaliteta radova ili drugog posla koji su predmet ugovora. Ukoliko se Izvođač ogluši, nalazi Nadzora nad građenjem smatraju se ispravnim, bez prava Izvođača na reklamaciju;
 - Izvođač je obavezan da na vrijeme putem dnevnika građenja izvještava Nadzor nad građenjem o svim pitanjima bitnim, za izvršenje ugovora, o početku pojedinih aktivnosti, o radionicama u pogonima u kojim se obavljaju pripremni radovi, kao i mehanizaciji koju angažuje za izvršenje radova. U dnevnik moraju biti unesene sve promjene i odstupanja od glavnog projekta. Građevinski dnevnik ovjerava Nadzorni organ i predstavnik Izvođača. Pored građevinskog dnevnika, Nadzorni organ Naručioca/Investitora vodi građevinsku knjigu, u koju se evidentiraju svi izvedeni radovi. Građevinska knjiga služi kao osnov za sastavljanje situacije za naplatu, kao i za trajno dokumentovanje obima izvedenih radova. Građevinska knjiga mora biti zapečaćena i ovjerena od strane Naručioca/Investitora, a potpisuju je Nadzorini organ i predstavnik Izvođača.
 - Pri izvođenju radova, Izvođač mora voditi računa da se ne ošteti već renovirani dio potkrovlja, kao ni okolni objekti i druge postojeće i izvedene instalacije. Svaku učinjenu štetu zbog nemarnosti ili neobazrivosti, zbog nedovoljne stručnosti, Izvođač je dužan otkloniti o svom trošku;

- Po završetku ugovorenih radova, Izvođač je obavezan da ukloni sav otpadni materijal koji je nastao kao posljedica izvođenja radova;
- Da po izvedenim radovima izradi Projekt izvedenog stanja, objekt preda Naručiocu/Investitoru sa cjelokupnom dokumentacijom neophodnom za rad Komisije za prijem radova, da zajedno sa Naručiocem učestvuju u radu Komisije za prijem radova;
- Naručiocu/Investitoru obezbijedi i preda ateste, licence i Projekat izvedenog stanja u 4 štampana i tvrdo koričena primjerka i 2 primjerka u elektronskoj formi u pdf i dwg formatu, na CD/DVD, sa potrebnim elaboratima i tehničkim podlogama, Upotrebnu dozvolu i drugu dokumentaciju, koja je nophodna za dalje održavanje i upotrebu objekta;
- Da po izvršenoj primopredaji objekta Naručiocu/Investitoru, u roku od 7 (sedam) dana od potpisivanja Zapisnika o primopredaji, dostavi garanciju za garantni period na iznos od 10% od vrijednosti ugovora, odnosno na iznos 25.464,06 KM, a koja će važiti za cijelo vrijeme garantnog perioda (24 mjeseca) + 30 dana.

Član 3.

Naručilac/Investitor je dužan da Izvođača uvede u posao u roku od 15 dana od dana potpisivanja Ugovora, u protivnom Izvođač će imati pravo da produži rok završetka radova.

Naručilac je izvršio obavezu uvođenja Izvođača u posao ako mu je predao:

- a) Dokaze o prijavi početka građenja, izdate od urbanističko građevinske inspekcije;
- b) Građevinsku dozvolu;
- c) Glavni projekat;
- d) Rješenje o postavljanju rukovodioca nadzora i nadzornih organa.

Na dan uvođenja Izvođača u posao, otvara se Građevinski dnevnik, u kome se konstatuje da ga je Naručilac/Investitor uveo u posao, a ovaj primio lokaciju i svu potrebnu dokumentaciju, čime su stvoreni uslovi da otpočnu radovi.

Upis iz prethodnog stava ovog člana vrši Nadzorni organ.

Član 4.

Izvođač je dužan da na kraju svakog mjeseca, u prisustvu Nadzornog organa, utvrdi količinu izvedenih radova, po pojedinim pozicijama i podatke unijeti u Građevinsku knjigu. Vrijednost izvršenih radova po situacijama, Izvođač će obračunavati na osnovu podataka o izvršenim količinama radova iz građevinske knjige i ugovorenih jediničnih cijena.

Izvođač će privremenu mjesečnu situaciju dostaviti Nadzornom organu putem građevinskog dnevnika, najkasnije do posljednjeg dana u mjesecu u kome su izvršeni radovi. Nadzorni organ će primljenu situaciju, ako nema primjedbi, ovjeriti u roku od 5 dana i dostaviti Naručiocu.

Izvođač je dužan da Izvedene radove fakturiše sa najviše 3 privremene i jednom okončanom situacijom.

Član 5.

Naručilac/Investitor se obavezuje da na ime cijene za sve radove iz člana 1. ovog Ugovora plati Izvođaču iznos od:

- bez PDV-a: 254.640,64 KM
(slovima: dvjestopedesetčetirihiljadešeststotinaičetrdeset i 64/100 KM)

- iznos PDV-a: 43.288,91 KM
(slovima: četrdesettrihiljadedvjestotineiosamdesetosam i 91/100 KM)

Ugovorena vrijednost, uključujući PDV iznosi: 297.929,54 KM (slovima: dvjestodevedesetsedamhiljadadevetstotinaidvadesetdevet i 54/100 KM).

Cijena iz stava 1. ovog člana je nepromjenjiva i određena je za sve radove, predviđene u ponudi Izvođača, po ponuđenim jediničnim cijenama.

U navedenu cijenu uključeni su svi troškovi potrebnih saglasnosti, dozvola, elaborata i projektne dokumentacije, troškovi za korištenje zemljišta za organizaciju gradilišta, za prekomjerno korištenje saobraćajnica, troškovi pripremnih radova, zatim svi troškovi rada, materijala i opreme, rada mašina, transporta, pomoćnih poslova, ispitivanje i dokazivanje kvalitete, troškovi geodetskog snimanja objekta, te takse, porezi, plate, režijski troškovi, troškovi osiguranja i svi drugi izdaci Izvođača za završetak radova do potpune funkcionalnosti i primopredaje objekta Naručiocu/Investitoru na upotrebu. Pored stavki iskazanih u Obrascu za cijenu ponude – radovi, ukupna cijena iz ugovora uključuje i sav nespecificirani materijal i opremu, te usluge i radove potrebne za dovođenje objekta u funkcionalno stanje.

Član 6.

Isplata radova vršit će se u roku od 30 dana, na osnovu ispostavljenih privremenih situacija i okončane situacije, na žiro račun Izvođača broj: 154 160 200 814 3021, otvoren kod Intesa San Paolo banke.

Naručilac/Investitor je dužan da u roku od 7 dana urednu i kompletnu privremenu situaciju ovjeri i uputi nadležnom Ministarstvu na plaćanje.

U slučaju neblagovremenog plaćanja, Naručilac odgovara Izvođaču, u skladu sa privilima o kašnjenju u plaćanju.

Član 7.

Izvođač je dužan da, za uredno i blagovremeno izvršenje radova koji su predmet ovog ugovora, obezbijedi i angažira dovoljan broj radnika prema strukturi koja obezbjeđuje uspješno izvođenje radova i da na mjesto izvođenja radova dopremi potrebnu i kvalitetnu mehanizaciju i opremu za završetak radova, a sve u skladu sa Ponudom iz člana 1. ovog Ugovora.

Član 8.

Izvođač se obavezuje da će sve radove iz člana 1. ovog Ugovora kompletno izvršiti i predati u roku od 90 (devedeset) kalendarskih dana, računajući od dana uvođenja u posao.

U slučaju postojanja „više sile“, kao događaja izvan kontrole jedne od ugovornih strana, a usljed čega postoji nemogućnost ispunjavanja obaveza po Ugovoru, rok za izvršenje obaveza bit će produžen za vremenski period tokom kojeg je postojala spriječenost ispunjavanja obaveza, pod uslovom da je pogođena ugovorna strana poduzela sve mjere da se izbjegnu nepovoljne posljedice po izvršenje obaveza i da je na vrijeme obavijestila drugu stranu. U dane zakašnjenja se ne računaju dani prestanka radova zbog „više sile“: rat, zemljotres, poplave, kišni dani, snijeg, ekstremno niske temperature duže od 5 dana u kontinuitetu, kao i neizvršavanje obaveza Naručioca/Investitora, a sve na osnovu pismenog zahtjeva Izvođača, na koje Naručilac/Investitor pismeno daje ili ne daje suglasnost.

Ako Izvođač svojom krivicom dovede u pitanje rok završetka radova iz člana 1. ovog Ugovora, prema Dinamičkom planu izvođenja radova i ugovorenom roku njegovog završetka ili od strane Naručioca/Investitora produženom roku, tada Naručilac/Investitor ima pravo da sve, ili dio

preostalih neizvršenih radova oduzme Izvođaču i bez njegove posebne suglasnosti ustupi na izvođenje drugom izvođaču.

Eventualne razlike po osnovu izmjene ugovorene cijene oduzetih radova i cijene ugovorenih sa drugim izvođačem, snosi Izvođač.

Izvođač je dužan da Naručiocu nadoknadi štetu koja je nastala zbog raskida ugovora iz razloga definiranih ovim ugovorom.

Član 9.

Izvođač može sklopiti podugovor, uz pismeno odobrenje Naručioca/Investitora, u skladu sa članom 73. Zakona o javnim nabavkama. Podugovaranje neće izmijeniti obaveze Izvođača, a Izvođač je obavezan navesti naziv podugovarača, vrstu i obim radova koje će podugovarač izvoditi.

Član 10.

Stručni nadzor nad izvođenjem radova Naručilac/Investitor će vršiti putem Nadzornog organa. Ako u toku izvođenja radova dođe do promjene Nadzornog organa, Naručilac/Investitor će o tome pravovremeno obavijestiti Izvođača.

Član 11.

Nadzorni organ ovlašten je:

- a) Da daje tehnička tumačenja eventualno nejasnih detalja u projektu, potrebnih za izvođenje radova u duhu uslova utvrđenih ugovorom;
- b) Da se stara da li Izvođač izvodi radove prema tehničkoj dokumentaciji;
- c) Da kontrolira kvalitet izvođenja radova, primjenu propisa, standarda, tehničkih normativa;
- d) Da kontrolira kvalitet materijala i opreme koji se ugrađuju;
- e) Da se stara o dinamici izvođenja radova u ugovorenom roku;
- f) Da ocjenjuje spremnost i sposobnost radne snage i oruđa rada angažiranih na izgradnji vanjskog uređenja objekta;
- g) Kao i da vrši i druge poslove koji proizlaze iz važećim propisa, a spadaju u nadležnost i funkciju nadzora.

Nadzorni organ nema pravo da oslobodi Izvođača od bilo koje njegove dužnosti ili obaveze iz ugovora, ukoliko za to ne dobije pisano ovlaštenje od Naručioca/Investitora.

Postojanje Nadzornog organa i njegovi propusti u vršenju stručnog nadzora ne oslobađaju Izvođača od njegove obaveze i odgovornosti za kvalitetno i pravilno izvođenje radova.

Član 12.

Kvalitet materijala koji se ugrađuju i izvedenih radova, Izvođač mora da dokaže atestima, izvršenim ispitivanjima materijala i radova, odnosno garantnim listovima proizvođača materijala i opreme. Sve troškove ispitivanja kvaliteta materijala i radova snosi Izvođač.

Rezultate svih ispitivanja, Izvođač mora blagovremeno dostavljati Nadzornom organu i moraju biti upisani u građevinski dnevnik. Ukoliko rezultati ispitivanja pokažu da kvalitet ugrađenog materijala ili izvedenih radova ne odgovaraju zahtijevanim uslovima, Nadzorni organ je dužan da izda nalog Izvođaču da nekvalitetni materijal zamijeni kvalitetnim i da radove dovede u ispravno stanje i sve o trošku Izvođača.

Član 13.

Nadzorni organ ima obavezu da zahtijeva od Izvođača da otkloni nekvalitetno izvedene radove i zabrani ugrađivanje nekvalitetnog materijala i opreme. Ako Izvođač, i pored upozorenja i zahtjeva Nadzornog organa, ne otkloni uočene nedostatke i nastavi sa nekvalitetnim izvođenjem radova, Nadzorni organ će radove obustaviti i o tome obavijestiti Naručioca/Investitora i nadležnu inspekciju i te okolnosti unijeti u građevinski dnevnik. Sa izvođenjem radova može se ponovo nastaviti kada Izvođač poduzme i sprovede odgovarajuće radnje i mjere, kojima se prema nalazu nadležne inspekcije i Nadzornog organa obezbjeđuje kvalitetno izvođenje radova.

Ako se između Nadzornog organa i Izvođača pojave nesuglasice i u pogledu kvaliteta materijala koji se ugrađuje, materijal se daje na ispitivanje.

Troškove ovog ispitivanja plaća Izvođač, koji ima pravo da traži njihovu nadoknadu od Naručioca, ako ovaj nije bio u pravu.

Materijal za koji se utvrdi da ne odgovara tehničkim propisima i standardima, Izvođač mora o svom trošku da ukloni sa gradilišta u roku koji mu odredi Nadzorni organ.

Član 14.

Suglasnost na izmjene i dopune tehničke specifikacije, na osnovu koje je ugovoreno izvođenje radova, daje Naručilac/Investitor, na prijedlog Nadzornog organa.

Član 15.

Nepredviđeni dodatni radovi podrazumijevaju radove koji nisu uključeni u prvobitno razmatrani projekat i precizirani u Ugovoru, ali koji su uslijed nepredviđenih okolnosti postali neophodni za izvršenje ili izvođenje i kao takvi se ne mogu tehnički ili ekonomski odvojiti od glavnog ugovora, bez većih nepogodnosti za Ugovorni organ.

Izvođač je dužan da o takvim događajima, odnosno okolnostima, bez odlaganja izvijesti Naručioca/Investitora.

Naknadni radovi su oni radovi koji nisu ugovoreni i nisu nužni za ispunjenje ugovora, a koje Naručilac/Investitor zahtijeva da se izvedu.

Član 16.

Za izvođenje nepredviđenih radova, Izvođač mora imati prethodnu pismenu suglasnost Naručioca/Investitora. Prijedlog ovih radova sa detaljnim opisom, predmjerom i predračunom ovjerenim od strane Nadzora nad građenjem, Izvođač u pismenom obliku dostavlja Naručiocu/Investitoru.

Predmjer radova podrazumijeva odgovarajuće dokaznice za količine, a za jedinične cijene, mora se dati i kalkulacija cijena.

Član 17.

Ako Izvođač bez krivice Naručioca/Investitora ne završi radove koji su predmet ovog Ugovora u ugovorenom roku, dužan je Naručiocu/Investitoru platiti na ime ugovorene kazne penale 1,00 % (jedan promil) od ugovorene cijene svih radova, za svaki dan prekoračenja ugovorenog roka

završetka predmetnih radova. Visina ugovorene kazne ne može prijeći 5% od ukupno ugovorene cijene radova.

Strane Ugovora ovim Ugovorom isključuju primjenu pravila po kojem je Naručilac/Investitor dužan saopštiti Izvođaču, po zapadanju u kašnjenje da zadržava pravo na ugovorenu kaznu (penale), te se smatra da je samim padanjem u kašnjenje Izvođač dužan platiti ugovorenu kaznu (penale), bez opomene Naručioca/Investitora, a Naručilac/Investitor je ovlašten da ih naplati – odbije na teret Izvođačevih potraživanja za izvedene radove na objektu, koji je predmet ovog Ugovora ili od bilo kojeg drugog Izvođačevog potraživanja od Naručioca/Investitora, s tim što je Naručilac/Investitor o izvršenoj naplati – odbijanju, dužan obavijestiti Izvođača.

Plaćanje ugovorene kazne (penala) ne oslobađa Izvođača obaveze da u cijelosti završi predmetne radove.

Član 18.

Izvođač je dužan da po završenim radovima, povuče sa gradilišta svoje radnike, ukloni preostali materijal, opremu i sredstva za rad koje je koristio u toku rada i očisti mjesto izvođenja radova od otpadaka.

Član 19.

Tehnički pregled i primopredaja izvedenih radova, vršit će se po završetku izvođenja radova, na način kako je to regulirano Zakonom o prostornom uređenju Kantona Sarajevo. Obavještenje da su radovi završeni, Izvođač podnosi Naručiocu/Investitoru preko Nadzornog organa.

Član 20.

Strane Ugovora su u obavezi da Komisiji za tehnički pregled i primopredaju izvedenih radova, prije početka njenog rada, dostave imena lica koja će prisustvovati tehničkom pregledu i stave na raspolaganje svu dokumentaciju u vezi sa izgradnjom/sanacijom dijela potkrovlja zgrade Kantonalnog tužilaštva Kantona Sarajevo.

Član 21.

Izvođač je dužan da postupi po primjedbama Komisije za tehnički pregled i primopredaju izvedenih radova, i to u roku koji mu odredi Komisija.

Ako Izvođač ne postupi po primjedbama iz stava 1. ovog člana u izrečenom roku, Naručilac/Investitor će sam ili preko drugog Izvođača otkloniti utvrđene nedostatke o trošku Izvođača.

Član 22.

Po obavljenom tehničkom pregledu i primopredaji izvedenih radova i otklanjanju utvrđenih nedostataka, Izvođač će u roku od 15 dana ispostaviti konačni obračun izvedenih radova.

Član 23.

Ovaj ugovor može se raskinuti sporazumno ili po zahtjevu jedne od strana Ugovora, ako su nastupili bitni razlozi za raskid Ugovora.

Ugovor se raskida pisanom izjavom, koja se dostavlja drugoj ugovornoj strani. U izjavi mora biti naznačeno po kom osnovu se Ugovor raskida.

Ugovor se ne može raskinuti zbog neispunjenja neznatnog dijela ugovorene obaveze. Ako strane ugovora sporazumno raskinu Ugovor, sporazumom o raskidu Ugovora utvrđuje se međusobna prava i obaveze koje proističu iz raskida Ugovora.

Član 24.

Ukoliko dođe do raskida Ugovora i prekida radova, Naručilac/Investitor i Izvođač su dužni da poduzmu potrebne mjere da se izvedeni radovi zaštite od propadanja. Troškove zaštite radova snosi strana ugovora čijom krivicom je došlo do raskida Ugovora, odnosno do prekida ugovora.

Član 25.

Strane ugovora su suglasne, da sve sporove koji nastanu iz odnosa zasnovanih ovim Ugovorom prvenstveno rješavaju sporazumno. Pri tom se, po potrebi, mogu koristiti usluge pojedinih stručnih lica ili tijela koja ugovorne strane sporazumno odrede.

Ukoliko se nastali spor ne riješi sporazumno, ugovara se nadležnost Općinskog suda u Sarajevu. Rješavanje spornih pitanja ne može uticati na rok i kvalitet ugovorenih radova.

Član 26.

Ovaj ugovor je pravno valjano zaključen i potpisan od dolje navedenih ovlaštenih zakonskih zastupnika strana Ugovora i sačinjen je u 4 (četiri) istovjetna primjerka, od kojih svaka ugovorna strana zadržava po 2 (dva).

Član 27.

Datumom zaključenja Ugovora smatra se datum potpisivanja Ugovora od strane Izvršioca, a koji ne može biti duži od 7 (sedam) dana od datuma potpisa Naručioca/Investitora.

Za sve što nije predviđeno i regulirano ovim Ugovorom, primjenjivat će se odredbe Zakona o obligacionim odnosima, Zakona o građenju i drugi pozitivni propisi koji reguliraju predmetnu oblast.

IZVOĐAČ:

Direktor:

Broj: 1504/2017
Sarajevo, 24.10.2017. godine

NARUČILAC/INVESTITOR:
Kantonalno tužilaštvo Kantona Sarajevo
Glavna Kantonalna tužiteljica:

Dalida Burzić

Broj: A-III-46/17-X
Sarajevo, 27.10.2017. godine